

Aðalfundur íþróttafélagsins Vestra fyrir árið 2020

Var haldinn mánudaginn 10. maí 2021 í Vallarhúsinu á Torfnesi og hófst hann kl. 20.00. Á dagskrá fundarins voru hefðbundin aðalfundarstörf samkvæmt lögum félagsins.

- 1. Fundarsetning.** Guðfinna Hreiðarsdóttir, formaður, setti fundinn og bauð fundarmenn velkomna.
- 2. Kosning fundarstjóra og fundarritara:** Guðfinna lagði til að Hjalti Karlsson yrði kjörinn fundarstjóri og Sólrún Geirsdóttir fundarritari. Það var samþykkt. Hjalti tók við fundarstjórn og kvaðst hafa kannað að fundurinn hefði verið löglega boðaður og bar undir fundinn hvort gerð væri athugasemd við boðun fundarins en fundurinn var boðaður á heimasíðu Vestra, www.vestri.is. Engin athugasemd var gerð, þannig að fundarstjóri úrskurðaði fundinn löglega boðaðan.
- 3. Fundargerð síðasta aðalfundar lögð fram.** Fundargerð síðasta aðalfundar er að finna á heimasíðu félagsins, www.vestri.is Engar fyrirspurnir eða athugasemdir.
- 4. Formaður félagsins gerir grein fyrir starfsemi aðalstjórnar á starfsárinu 2020:**

STARFSSKÝRSLA FORMANNS AÐALSTJÓRNAR VESTRA 2020

Síðasti aðalfundur félagsins var haldinn 4. júní 2020, sem var mun seinna en lög félagsins gera ráð fyrir, en samkomubann vegna Covid-19 hafði komið í veg fyrir fundarhöld fram að því. Á þessum aðalfundi varð sú breyting á stjórn að Hjalti Karlsson lét af störfum sem formaður og Guðfinna Hreiðarsdóttir tók við formennsku. Þá gekk Sigurður Jón Hreinsson úr stjórn og Hlynur Reynisson kom í hans stað. Á fyrsta stjórnarfundum eftir aðalfund var Hjalti Karlsson var formaður, Sólrún Geirsdóttir var kjörin ritari, Guðni Guðnason er sem fyrr gjaldkeri. Aðalstjórn fundaði níu sinnum á árinu, þar af voru þrjú fjarfundir. Tveir formannafundir voru haldnir um haustið, annar þeirra í fjarfundi. Í þessari starfsskýrslu verður einungis tæpt á helstu viðfangsefnum stjórnar og vísast að öðru leyti í fundargerðir aðalstjórnar á heimasíðu félagsins.

COVID-19 OG ÁHRIF ÞESS Á STARFSEMI FÉLAGSINS

Á aðalfundinum í júní voru menn bjartsýnir á að við værum komin yfir það versta hvað Covid-19 varðaði og þaðan í frá lægi leiðin upp á við. Lítið vissum við þá. Á Íslandi var íþróttastarf með eðlilegum hætti framan af ári 2020 en seinni part febrúar fóru fyrstu tilföllin af Covid-19 að greinast á Íslandi og hafði það fljótlega áhrif á hefðbundið íþróttastarf. Þann 20. mars féll allt íþróttastarf niður og fór ekki af stað aftur fyrr en upp úr miðjum maí. Þrátt fyrir samkomutakmarkanir var sumarstarfið með nokkuð eðlilegum hætti þó ýmsar hömlur væru vegna sóttvarna þar til í lok júlí. Þá voru sóttvarnaaðgerðir hertar að nýju með tilheyrandi takmörkunum á starfsemi íþróttafélaga. Aðgerðir voru svo enn hertar 7. október og mótahaldi í öllum aldursflokkum frestað til 19. október en þá komu tilmæli frá sóttvarnarlækni um að allt íþróttastarf yrði stöðvað og frá 31. október voru allar íþróttir, þar með talið æfingar og keppni barna og fullorðinna, innan- eða utandyra, með eða án snertingar, óheimilar. Þá var m.a. keppni í úrvaldsdeild karla í knattspyrnu hætt en mótið hafði dregist á langinn vegna sóttvarnaaðgerða á árinu. Þann 18. nóvember var heimilt að hefja æfingar að nýju með ströngum skilyrðum og frá 13. janúar á þessu ári voru íþróttæfingar barna og fullorðinna heimilar með og án snertingar innan- og utandyra og íþróttakeppnir barna og fullorðinna heimilar án áhorfenda. Seinnipartinn í mars var öllu skellt í lás aftur fram í miðjan apríl.

Íslandsmótum í blaki og körfuknattleik var hætt vorið 2020 en um sumarið stefndi allt í að hægt yrði að halda Íslandsmót komandi vetrar að uppfylltum skilyrðum um sóttvarnir þannig að forráðamenn deildanna fóru að undirbúa tímabilið og semja við leikmenn, þjálfara og aðra starfsmenn. Meistaraflokkur karla hjá körfuknattleiksdeild Vestra hafði spilað einn leik í 1. deild þegar sóttvarnaraðgerðir voru hertar að nýju og mótið var stöðvað. Næsti leikur hjá þeim fór fram 15. janúar 2021. Meistaraflokkur kvenna í körfu náði tveimur leikjum um haustið og þriðji leikurinn var svo 16. janúar. Hjá blakdeildinni náði meistaraflokkur karla að spila einn leik í efstu deild í upphafi hausts og síðan ekkert fyrr en í 31. janúar 2021. Strangar sóttvarnareglur voru í gildi á undirbúningstímabili knattspyrnudeildarinnar vorið 2020 en reglur rýmkaðar þegar leið að sumri og keppni heimiluð með ströngum skilyrðum um sóttvarnir. Hafði keppnis-tímabilinu þá þegar seinkað talsvert og var ekki lokið þegar allt íþróttastarf var stöðvað 31. október. Átti meistaraflokkur karla þá eftir tvo leiki. Hjólreiðadeildin glímdi, eins og aðrir, við ýmsar takmarkanir vegna Covid-19. Mót heima og heiman féllu niður en engu að síður skiluðu sér í hús fyrstu Íslands- og bikarmeistararitlar hjólreiðadeildar Vestra og það er augljóslega mikill sóknarhugur í þessum ungliða Vestra. Covid-19 hafði mikil áhrif á yngri flokka starf allra deilda og lá alveg niðri svo vikum skipti. Þegar æfingar og mót voru heimiluð þá var það með ströngum skilyrðum og margir stærri íþróttaviðburðir ætlaðir börnum féllu niður. Um starfsemi deilda félagsins er að öðru leyti er vísað í starfsskýrslur þeirra fyrir árið 2020.

Fjárhagsleg áhrif vegna Covid-19 hafa verið umtalsverð. Verulegur samdráttur varð í tekjum en á móti breyttist rekstrarkostnaðurinn lítið. Félögin sátu uppi með launakostnað, húsnæðis-kostnað o.fl. þar sem aðgerðir sóttvarnaryfirvalda tóku nánast alltaf til skamms tíma í einu. Alltaf voru vonir bundnar við að hægt yrði að halda mótum áfram en reyndin varð sú að oftast lengdist tíminn sem aðgerðirnar giltu og óvissa var um framhaldið. Ríkið hefur stutt við íþróttahreyfinguna með því að leggja til fjármuni til að mæta áhrifum Covid-19. Vorið 2020 fékk Vestri 3,2 m.kr. í styrk vegna almennra aðgerða sem dreifðist á deildir félagsins skv. sömu útreikningum og lottótekjurnar. Jafnframt var hægt að sækja um sértækan styrk vegna taps eða tekjufalls vegna viðburða sem hætt var við fyrri hluta árs vegna Covid-19 og fékk blak-deildin 360 þús kr. úr þeim sjóði. Ekki hefur enn verið auglýstur sértækur styrkur vegna tekju-falls á seinni hluta ársins en hins vegar var aftur núna í vor úthlutað styrk vegna almennra aðgerða og fékk Vestri þá 3,4 m.kr. Í janúar á þessu ári var jafnframt opnað fyrir umsóknir vegna endurgreiðslu á launakostnaði og verktakagreiðslum hjá íþróttafélögum og öðrum samböndum sem starfa innan Íþrótt- og Ólympíusambands Íslands og þurftu að fella niður starfsemi tímabundið, að hluta eða öllu leyti, vegna opinberra sóttvarnarráðstafana á tíma-bilinu 1. október 2020 til og með 30. júní 2021.

SKULDIR VEGNA LEIGUÍBÚÐA

Ýmis mál komu inn á borð aðalstjórnar Vestra á síðasta starfsári og hafa sum hver teygt sig yfir á núverandi starfsár. Ber þar fyrst að nefna húsaleigumálið svokallaða en seinnipartinn í ágúst 2020 kom erindi frá HSV þar sem greint var frá því að Vestri skuldaði 1.094.533 kr. í húsaleigu fyrir árið 2019 eftir að búið var að draga lottótekjurnar frá. Þann 5. febrúar á þessu ári sendi Vestri erindi á Héraðssamband Vestfirðinga og bæjarráð Ísafjarðarbæjar þar sem óskað var eftir því að leitað yrði leiða til að afskrifa þessa húsaleiguskuld í ljósi erfiðra aðstæðna íþróttafélaga vegna Covid-19. Í framhaldinu var haldinn fundur með stjórnnum HSV og Vestra þar sem fram kom að húsaleiguskuld Vestra fyrir árið 2020 væri 3.261.305 kr. eftir að að búið var að draga lottótekjur frá. Jafnframt kom fram að HSV væri búið að greiða Ísafjarðarbæ alla húsa-leigu fyrir 2019 og 2020 þannig að ekki væri hægt að óska eftir að skuldin yrði felld niður eða lækkuð hjá Ísafjarðarbæ þar sem þegar væri búið að greiða hana. Húsaleiguskuld Vestra var því samtals 4.355.838 kr. vegna árána 2019 og 2020. Það verður að segjast eins og er að þessi

mikla hækkun á milli ára kom stjórn Vestra nokkuð í opna skjöldu, ekki síst í ljósi þess að tekjur félagsins af lottó og getraunum hækkuðu úr 3.284.565 kr. árið 2019 í 4.407.074 kr. árið 2020 eða 1.122.509 kr. á milli ára. Undanfarin ár hafa lottótekjur að mestu staðið undir húsnæðis-kostnaði en skýringin á þessari miklu hækkun á milli ára er fyrst og fremst sú að sveitarfélagið leggur færri íbúðir fram sem styrk til íþróttafélaganna og þar af leiðandi þurfa þau að leigja fleiri íbúðir á fullu verði sem hækkar meðalleiguverð umtalsvert auk almennrar hækkunar á leiguverði. Í ljósi þessa var sent erindi til bæjarráðs Ísafjarðarbæjar þar sem óskað var eftir því að sveitarfélagið kæmi til móts við Vestra með lækkun á leiguverði árið 2021 sem næmi upphæð skuldarinnar. Fengum við þau svör að Ísafjarðarbær legði nú þegar til fimm íbúðir til HSV samkvæmt samningi og bæjarráð sæi ekki að svigrúm væri til að veita styrk vegna leigu-íbúða umfram gildandi samning. Ljóst er að það verður strembið fyrir deildir Vestra að greiða þessa skuld jafnhliða húsaleigu fyrir árið 2021.

NEFND UM FRAMTÍÐARSKIPULAG Á TORFNESI

Þann 21. október fékk Vestri sent erindi frá HSV þar sem kom fram að Ísafjarðarbær væri búinn að setja af stað nefnd til þess að fara yfir framtíðarskipulag fyrir Torfnessvæðið. Óskað var eftir hugmyndum og tillögum frá íþróttafélögum fyrir 1. nóvember 2020. Fór þetta inn á samráðs-vettvang Vestra á Facebook og komu fram nokkrar tillögur en þátttakan hefði mátt vera meiri. Vestri sendi inn fjölbreyttar og góðar tillögur og hefur ekkert heyrt frá þeirri nefnd síðan. Í þessari vinnu var tækifærið notað til að benda enn og aftur á nauðsyn þess að bæta aðstöðu í anddyri og opnu rými íþróttahússins á Torfnesi á Ísafirði sem og að betrumbæta búnings-aðstöðuna í íþróttahúsinu á Torfnesi. Þar eru nú þrjár búningsklefar en þyrftu að vera fjórir. Í tillögunum var einnig bent á að körfuboltavöllurinn á Torfnesi væri ónýtur og þyrfti að koma upp nýjum velli og jafnframt finna nýja staðsetningu fyrir hann þar sem hann lendir inn á vallarsvæði Torfnesvallar og urðu af því nokkur vandræði um sumarið þar sem girðing sem sett var upp til bráðabirgða sl. vor við norðurenda vallarins lá þvert yfir körfuboltavöllinn og kom í veg fyrir eðlilega notkun á honum. Í ljósi þessa og til að koma í veg fyrir að sagan endurtæki sig að ári, var strax um haustið sent inn erindi þar sem hvatt var til þess að lögð yrðu drög að því að leysa þetta mál fyrir næsta sumar og skilst mér að hafi verið gert.

VALLARHÚSIÐ

Eitt þeirra mála sem aðalstjórn hefur haft á sinni könnu síðustu ár er efri hæðin í Vallarhúsinu á Torfnesi þar sem fyrirhugað er að útbúa almennilega félagsaðstöðu fyrir Vestra. Gerður var uppbyggingarsamningur við Ísafjarðarbæ um endurbætur á húsnæðinu sem fól í sér vilyrði fyrir styrk að upphæð 1,83 m.kr. Það var farið í framkvæmdir árið 2019 þar sem rafmagnsmál voru m.a. tekin í gegn en ekkert gerðist hins vegar árið 2020. Stefnt er að því að koma þarna upp eldhúsi og salerni sem er kostnaðarsöm framkvæmd og óljóst hvernig verður fjármögnuð.

ÍÞRÓTTASKÓLINN

Um miðjan október barst yfirlýsing frá körfuknattleiksdeildinni þar sem tilkynnt var að deildin segði sig frá íþróttaskóla HSV. Voru ástæðurnar fyrst og fremst þær að illa gengi að fá þjálfara til að sinna þessu verkefni, lítil áhugi væri hjá iðkendum og almennar efasemdir um fyrirkomulag hans og hverju hann skilaði. Íþróttaskólinn hefur verið til umræðu á formannafundum HSV og ljóst að skiptar skoðanir eru á starfsemi hans. Hvað sem fólki finnst þá er mikilvægt að taka umræðu um íþróttaskólann þar sem farið verður yfir starfsemina, hvort þau markmið hafi náðst sem lagt var af stað með í upphafi, hver árangurinn er og hvert á að stefna til framtíðar. Það má geta þess að meðal tillagna á komandi ársþingi HSV er tillaga um að skipaður verið starfshópur til að fjalla um framtíðarskipulag íþróttaskóla HSV.

FÉLAGSGJÖLD OG GETRAUNALEIKUR

Á síðasta aðalfundi var ákveðið að árlegt félagsgjald yrði 2.000. kr. Á skrá voru um 800 félagar en alls greiddu eitthvað í kringum 330 manns félagsgjaldið sem var nú innheimt í fyrsta sinn. Fáeinir skráðu sig úr félaginu og færri en búast hefði mátt við. Til viðbótar eru smá tekjur af getraunaleik Vestra sem hefur gengið vel og um að gera að fá fleiri til að þátt. Þetta eru vel þegnar tekjur sem nýtast til að standa straum af sameiginlegum kostnaði, s.s. bókhalds-kostnaði og rekstri á heimasíðu.

KNATTSPYRNUHÚSIÐ

Á aðalfundum Vestra hefur verið hefð fyrir því að formaður greini frá því hvernig mál standa varðandi fyrirhugað knattspyrnuhús enda stórt og mikið hagsmunamál fyrir alla íþróttahreyfinguna. Er hér gripið niður í skýrslu stjórnar frá síðasta aðalfundi: „Formaður hugðist flytja nákvæmlega sama pistil og á síðasta aðalfundi um þetta málefni þar sem fátt verulega markvert hafði gerst síðasta ár. Pistillinn var svohljóðandi: Eitt mikilvægasta hagsmunamál íþróttahreyfingarinnar í Ísafjarðarbæ er og hefur verið bætt aðstaða knattspyrnumanna. Um nokkurt skeið hefur verið stefnt að byggingu knattspyrnuhúss sem mun gjörbreyta aðstöðu knattspyrnumanna til hins betra. [...] Um hið væntanlega hús væri hægt að fjalla um í löngu máli og sýnist sitt hverjum. Hvernig hús, hvaða stærð, hæð þess, staðsetning og kostnaður. Ekki er ástæða til að fjölyrða um það hér, heldur fagna því að nú hyllir í að löngu tímabær uppbygging hefjist á Torfnesi. Þannig hljóðaði pistill síðasta árs. Nú ber svo hinsvegar við, að hreyfing virðist komin á málið, þó ekkert sé naglfast. Í gær [3. júní 2020] fól bæjarráð bæjarstjóra að skrifa undir viljayfirlýsingu við fyrirtæki um byggingu knattspyrnuhúss. Því ber sannarlega að fagna sem stórum áfanga í langri sögu. Um það hvort nú sé virkilega rétti tíminn til slíkra framkvæmda segi ég aðeins, að furðulegt nokk virðist stundum aldrei vera rétti tíminn til tiltekinna framkvæmda. Hvað sem tíminn leiðir í ljós kys ég að treysta kjörnum bæjarfulltrúum bæði fyrir fjárhag og framkvæmdum Ísafjarðarbæjar.“ Þannig hljóðaði pistill fyrirverandi formanns á síðasta aðalfundi og það er skemmst frá því að segja að ekkert hefur gerst í þessu máli og ekki að sjá að knattspyrnuhúsið rísi á næstunni.

AÐ LOKUM

Covid-árið 2020 skráði sig á spjöld sögunnar með afgerandi hætti og fyrirfram hefðu fáir trúað því að hægt yrði að setja heilu þjóðfélögin í „lockdown“. Íslendingar hafa sloppið betur en margar aðrar þjóðir en hafa engu að síður þurft að aðlaga lífnaðarhætti sína að ströngum skilyrðum um sóttvarnir og þeim takmörkunum sem settar hafa verið á mannleg samskipti. Eðlilega hefur íþróttahreyfingin haft áhyggjur af því að missa tengslin við fólkið sitt en sem betur fer sýnist mér það ekki vera raunin, fólkið okkar er þarna enn, líkt og grasið sem kemur grænt undan snjónum á vorin. Það sem er hins vegar áhyggjuefni er framtíð sjálfbóðaliðastarfs og það hefur ekkert með Covid að gera. Almennt eru menn á því að sífellt verði erfiðara að fá fólk til að taka þátt í félagsstarfi og jafnvel vandkvæðum bundið að fá foreldra iðkenda til að leggja sitt af mörkum til að hægt sé að halda úti íþróttastarfi fyrir börn, sem verður ekki gert nema með sjálfbóðavinnu. Ég ætla að ljúka þessari yfirferð á því að þakka öllum styrktaraðilum og stuðningsmönnum Vestra fyrir standa með og styðja félagið sitt í gegnum brimsjóí síðasta starfsárs. Umfram allt ber þó að þakka og hrósa forráðamönnum deildanna fyrir ótrúlega elju, útsjónarsemi og þá gríðarlegu vinnu sem menn hafa lagt á sig til að hægt væri að halda uppi íþróttastarfi við krefjandi og fordæmalausar aðstæður. Áfram Vestri!

5. **Lagðir fram endurskoðaðir ársreikningar félagsins.** Guðni Guðnason gjaldkeri Vestra, lagði fram endurskoðaða ársreikninga sem samþykktir hafa verið af skoðunarmönnum félagsins. Hann fór yfir helstu lykiltölur í rekstri félagsins, einkum bókhald aðalstjórnar. Reikningarnir liggja frammi á heimasíðu félagsins. Fundarstjóri opnaði fyrir umræður um þá að lokinni yfirferð gjaldkera. Nokkrar umræður urðu um reikningana en að þeim loknum bar fundarstjóri þá upp til samþykktar og voru þeir samþykktir í einu hljóði.
6. **Ákvörðun félagsgjalds.** Á síðasta aðalfundi var ákveðið að árlegt félagsgjald yrði 2.000. kr. Guðni Guðnason, gjaldkeri félagsins, bar fram tillögu að það yrði óbreytt. Félagsgjaldið sem hafði verið lengi í undirbúningi var loks sent í innheimtu árið 2020 og gekk innheimtan vel og vonast er til að svo verði einnig í ár. Tillagan var samþykkt.
7. **Fjárhagsáætlun lögð fram til samþykktar.** Fundarstjóri gaf Guðna Guðnasyni gjaldkera orðið. Hann fór yfir helstu tölur í fjárhagsáætlun líðandi árs og fundarstjóri opnaði síðan fyrir umræður. Tillagan borin upp til atkvæða og samþykkt.
8. **Lagabreytingar.** Fundarstjóri upplýsti að engar tillögur um lagabreytingar hafi borist fyrir aðalfund.
9. **Kosningar**
 - a. Kosinn formaður. Tillaga: Guðfinna Hreiðarsdóttir. Samþykkt með lófataki.
 - b. Kosnir þrír stjórnarmenn til tveggja ára í senn. Tillögur: Hjalti Karlsson, Hlynur Reynisson og Jóna Lind Kristjánsdóttir. Fyrir eru í stjórn Guðni Guðnason, Gísli Jón Hjaltason og Sólrún Geirsdóttir sem kjörin voru síðastliðið ár til tveggja ára. Samþykkt með lófataki.
 - c. Kosnir tveir varamenn til eins árs. Tillögur: Jónas Gunnlaugsson og Þorsteinn Þráinsson. Samþykkt með lófataki.
 - d. Kosnir tveir skoðunarmenn reikninga og einn til vara. Tillögur: Ásdís Birna Pálsdóttir, Sigrún Sigvalda og Gísli Úlfarsson til vara. Samþykkt með lófataki.

10. Önnur mál

Guðfinna: Mikil vinna var lögð í jafnréttis- og viðbragðsáætlun fyrir ekki svo löngu og m.a. kosinn trúnaðarmaður félagsins, Birna Lárusdóttir. Hún er nú flutt úr bænum og leggur. Guðfinna til að Jóna Lind Kristjánsdóttir eða Heiðrún Tryggvadóttir verði fengnar til að taka við keflinu enda voru þær í vinnuhóp um viðbragðsáætlun. Hjalti ítrekaði að setjast þurfi yfir siðareglur félagsins með nýjum félagsmönnum í upphafi hvers tímabils. Samúel spurði hvort ekki lægju inni peningar hjá Ísafjarðarbæ til framkvæmda við vallahús. Guðfinna svaraði, með vísan í það sem komið hafði fram áður en Samúel mætti á fundinn, að eftirstöðvar væru ca 2,5 milljónir, en ekki væri hægt að fara í miklar framkvæmdir fyrir þá peninga. Gott ef hægt væri að klára lýsinguna og hurðina. Hjalti: Málið er aðeins flóknara. Ýmislegt sem gerðist á árinu sem varð til þess að „stóru málin“ (veggjarbrot og fleira) stöðvuðust. Aðalstjórn mun áfram skoða ljós og lýsingu í salnu,.

Guðfinna minnti á ársþing HSV sem frestað var til 19. maí.

Guðfinna rifjaði upp að fyrir Covid kom fram hugmynd um sameiginlegan viðburð á vegum félagsins, t.d. þorablót eða árshátíð. Mjög þarft og gott og um að gera að halda þeirri hugmynd á lofti.

Samúel: Aðalstjórn þarf að funda með deildum áður en fjárhagsáætlun Ísafjarðarbæjar fer í gang. Bjarki tók undir það og stakk upp á að aðalstjórn sendi inn tillögur í lok ágúst.

Sigurður Hreinsson: Hrósaði aðalstjórn fyrir góðan rekstur og deildunum fyrir vel unnin störf.

Samúel sagðist óttast að dæmið snúist við og árið 2021 komi út í mínus, einkum vegna húsaleigumálsins.

11. **Fundarslit.** Fundarritara var falið að ganga frá fundargerð og birta á heimasíðu. Hjalti gaf Guðfinnu orðið og hún þakkaði fyrir traustið sem henni er sýnt að stýra félaginu áfram. Hún ítrekaði að VIÐ höfum staðið okkur vel miðað við aðstæður. Henni finnst vinna félagsmanna ekki vera metin að verðleikum. Ísafjarðarbær mætti sýna okkur meiri skilning. Boðið hefur verið upp á það íþróttastarf sem hægt hefur verið hverju sinni. Þetta framboð skiptir máli þegar fólk hyggur á flutninga til svæðisins og veltir fyrir sér búsetu. Að því mæltu sleit Guðfinna fundi og þakkaði fundarmönnum fyrir fundinn.

Fundi slitið kl. 21:00

Fundarritari: Sólrún Geirsdóttir.